

JEAMIJ

Wargahng Agweed Jeamije

Rob Ke Nying Warga

Warga gihn agweed Jeamije ngo beehda luub cohg wihj. Cohg wudh nyoge yihdh giijh me thoohdh ke dhe yoohn giijh atiihj. Warga gihn ngo agweed ke yihr yaa akeedho ke bang upiny cang giijh acub rog gen yihr Juog. Jeamij agweehdo kaa dhe yoohn ucaale ke duol me teeg ne cohg luube piny ke nying loohng gihr tiijh kede a nyoadh dhe yoohn jo yiiho ne kaahn gene. Ngo arubo ke nying nyepinye me thoohdh mee giijh yug rog gen keew jo yiiho, neehn lonyo kede a kahj, giijh utum, beehdo me beer, kwany kiin nyoge, mad yiiho ke tiijh, rob ne yahng, loohng, weehr, nyaam, dhaahl, beel, guum kede a kway Juog.

Warga gihn ni niing ngo kejea yiiho ge caahdh kaa tiijh tiehd keew jo ayiih Juog.

Kaa Acaan Luube

Lum umodho 1:1

Yiiho kede a loohng 1:2-8

Kahj kede a lonyo 1:9-11

Med cwihny kede a utum 1:12-18

Lihng kede a tiijh nyepinye 1:19-27

Toohn ke nying paahng keew nyoge 2:1-13

Yiiho kede a tiijh 2:14-26

Ngad yiiho kede a leebe 3:1-18

Ngad yiiho kede a yaa upiny 4:1-5:6

Dhog yiehdhe me thoohdh ne cohg nyepinye 5:7-20

¹ Beehda an, a Jeamij ge ubaahng Juog kede a ubaahng Ruohdh Jeacuu Kriihjto an ne gweehd yihru wu Judea ke karu noono nahgu tien mieh r apaar wonge ariow, wu ge akeedho ke bang upiny cang. Wu amaahdha.

Guum Giih Me Reje

² Jo'a mihn cwihnyu keraahyo nea wu apahdh yihdh giih utum me thoohdh. ³ Bang gihn ngo ngahyu nea ka yiihu kii ngo ke tumo e naa kaa abeehnu ne ngahy guum giih me reje. ⁴ Dhiilu guum giih me reje ke keehl guge e wu be dhaahr. Nea wu buu udhaahr e naa ka unieng lum Juoge yi cwihnyu ne cohg utoor gihn me daage. ⁵ Nea dhaano kiinu yoohn beehdo me beer ge nhyaar Juoge kwihye, e kea kway ngaan nu Juog ge muoj nyoge cang ke med cwihny e ngaa me caye tooro. Kwaye Juog bang gihn ngo ucub Juoge yihre. ⁶ Abea nea dhaano ukwahyo e kea gaahne gihn kwaye kede a e yea be diiw. Bang gihn kwaad ngaa yea diiw uroomo wa athewo yi naam duohng ge wiihe loang yame. ⁷ Kwaad ngaan nu wiihe keá pare kejea gihn muu ucub Jeacuu Ruohdhe yihre nud, ⁸ bang gihn kwaad ngaan nu gihn daahde kwihye noono e ngo neehn uthuohn ariem goohy ariow.

Ngad Ngoohngo Kede a Ngad Lonyo

⁹ Ngad akuud yaa ayiiho maa angoohng dhiile nhyaa bang gihn wiihe atihng Juoge maalo. ¹⁰ Abea ngad akuud yaa ayiiho maa alony mihn cwihnye bang gihn ngo ameehg Juoge doohng ne ngaa me ne bahdh laah. Lonye noono ukeedh wa mar thiiw yaadh maa aryaaw. ¹¹ Cahng me moohl e liehdh ge cea ne keehd piny ke leehdho e yaadh ryaawe ryaawo ubeehn thiiw giithe ulwaar gene

1:1 1:1 Mat 13:55; Tiiphy 12:17; 15:13; 21:18; 1Kor 15:7; Gal 1:19; 2:9; 1Pii 1:1

1:2 1:2-3 Rom 5:3-5; 1Pii 1:6-7 1:6 1:6 5:13; Mat 7:7; 21:21-22; Epi 4:14

1:9 1:9 2:5 1:10 1:10 5:1

oogo kedea uryaaw yaadhe raaj mee. Wa gihn nu thiw ngaa maa alony, giikh lonye ge uryaaw oogo yi cinge maano e ngo cong yihdh giithe.

Juog Nyoge Be Tume

¹² Mihn cwihny ngaa guum giikh me reje bang gihn nea ngo atum ugoohge nyoge, e kuowo gihn akob Juoge kea ngo ucube yihyr yaa anhyaare, ngo uyoade.

¹³ Nea dhaano ree ayoade e apahdh yihdh giikh utum e keá koohbo kea, “Juog a ameehge pahdh yihdh giikh utum.” Keá koohbo wa gihn nu bang gihn Juog be tum gihn me raaje kedea Juog dhaano be tume upahdhe yi giikh me raaj. ¹⁴ Dhaano e keede e ne meehg ree pahdh yihdh giikh utum ge yuohd cwihnye rog giikh me reje. Noonno e cwihnye urwaahnyo upahdhe yihdh giikh utum.

¹⁵ Kaano nea gihn ayuohd cwihnye rih ngo, ngo ayoade, e adhemuohm atiihye kedea nea adhemuohm adoongo rih dhaano e ngo kahl thoo.

¹⁶ Jo'a maa anhyaara nea wa gihn nu e rogu keá meehgu dwaahngo upahdhu yihdh giikh utum. ¹⁷ Kwaad gihn me beer kedea muuny me ne cohg ge beehn ke bang Juog ke yoohn maalo. Juog e naa acag giikh meeny piny ge yi maalo kedea Juog ree be waare wa mar tubo. ¹⁸ Juog en naa apar ngo umuoje won ke kuowo me guge tooro ke dhe yoohn Ciig Beer ge rob adiehr beere wo naa ateehg gihyr umodho ge akuong ke cubo yihyr Juog keew giikh acage cang.

Lihng Kedea Tiij

¹⁹ Jo'a maa anhyaara, cubu gihn ni yi cwihnyu beer mee. Beehn kwaad dhaane cege yihdhe beer ne lihng kedea ngo keá guo paahr yi rob, maa cwihnye keá laar

1:12 1:12 5:11; 1Kor 9:24-25 1:13 1:13 1Kor 10:13 1:14 1:14-15 Rom
6:19-21; 7:7-10; 1Jon 2:16-17 1:17 1:17 Mat 7:11 1:18 1:18 Jon 1:13;
Rom 8:19-23; 1Pii 1:23 1:19 1:19 3:2

rahnyo. ²⁰ Bang gihn rahny cwhiny dhaano be yuge naa abiohgrwaal ke Juog wa kaa adaahd Juoge. ²¹ Nea maano kea logu giijh reje kedea giijh anyoohne ge anyoohr ngahdhu kedea yugu rogu ne nyoge maa now uyiihu lum Juog ge apuohny yihru. Bang gihn lum nu e nuu uboadh wun.

²² Nahgu yaa tiiphy giijh apuohny yihru ke nying lum Juog. Rogu keá kangu uyugu rogu ne yaa lihng cog abea gihn me tiiphy tooro. ²³ Ngaa me lihng lum Juoge abea gihn rob lum Juoge be tiiphye, uroomo ke ngaa maa aniid kuohme yi madhara ge maany wonge keehde ni. ²⁴ Batién kaa amaanye wonge, e ngo a'aay. Abea naa a'aaye kar madhara e wiihe aguo wulo ukwihye kaa anaa aniide wonge kii ngo. ²⁵ Abea ngaa cub cwhinye piny ne cohg ne maany yihdh loohnge maa athiir ge cub laahw wihj kedea e ngo be dhaahr ke maany yihdh loohnge, kedea e yihdh gen deade deado thiow, ngaan tiiphy giijh nu ngo udooj yi tiiphye.

²⁶ Ngaa me koohbo kea e ngad lum Juog abea leebe be koare urube oogo ne pahy, e ngaan nu ree akange kedea gihn anahge ngad lum Juog gihr nyinge tooro. ²⁷ Lum Juog me ne cal cal me yea tooro giijh nyooro e man: maany kiihye kedea gule me ne yi ngoohng wong, kedea koar rog ubahnge dhaano ree be meehge raanyo yihr giijh reje wiih piny. Giijh ni ge naa dhe yoohn wuor Juog me ne cohg.

2

Kwany Kiin Nyoge Amahn

1:21 1:21 Klo 3:8; 1Pii 2:1 1:22 1:22 2:17; Mat 7:24, 26; Rom 2:13 1:25
 1:25 2:12, 24; Jon 13:17; Rom 8:2; Gal 6:2 1:26 1:26 3:2, 10 1:27 1:27
 Mat 25:35-36

¹ Jo'a wa ka nahgu nyoge maa ayiiho yi lum Ruohdho Jeacuu Kriihjto ge wiihe amoar ni, kiin nyoge keá kwanyu kejea ngaa moogo beer kedeá ngaa moogo raaj. ² Koohbo kejea nyoge ariow ge abeehn ka maa amahd yaa akuud yaa yiihoe yea. Ngaa moogo kiin gen beehda ngaa maa alony maa angaab waare maa awuob me ngien gen teeg kedeá lweede ne joadh gihd dhaahb. Kedeá ngaa moogo beehda ngaa maa angooohng maa angaab jwaahd waare. ³ Nea ngaan angaab waare maa awuob e ne ngahyi ke loro urubi yihre kobi, “Ngaan duohng, kar piih maa awuob e man. Piihi.” Abea yihd ngaan angaab jwaahd waare yih urubo yihre kobi, “Nyieh, cuung kari noono wale beehn ne piih piny yi ngoom kan thaahdh tiena,” ⁴ ngahda e kiinu akwanyu kedeá rogu ayugu ne nyoge me kihmo abea giid paru ge giid anyoohne ne?

⁵ Lihngu giid jo'a maa anhyaara. Ngahda Juog akwany nyoge maa angooohng me giid wiih piny tooro yihd gen kedeá uyuge gen ne nyoge me lony gen beehda yiiho ne? Kedeá ngahda Dhaahr Juog giid akob Juoge kejea ngo ucube yihd yaa anhyaare, ucube yihd gen ne? ⁶ Yaa angooohng koohm gen adhahlu ne cohg! Ngahda yaa alony ge ne kaahn wun ke cing nyooro ne? Ngahda ge naa yaa piej wun ne kedh nyum ruohdhe yi lug ne? ⁷ Ngahda ge ne rob giid me reje ke nying Jeacuu ngaan adoohngu ne yaae ne?

⁸ Yih unahg ngaa maa atiihy giid maa athiir me ne cohg nea loohng ruohdh giid agweed yi kitaab Juog naa, “Nhyaar wadu wa ka nhyaari rihi,” ngo be dhahli. ⁹ Abea nea ke dhe yoohn giid niidi e ne poji kiin nyoge pojo e adhemuohm ayugi kedeá yih

2:1 2:1 2:1-9; Mat 5:45; Tiihy 10:34; Rom 2:11; 10:12; Gal 2:6; Epi 6:9; Klo 3:25; 1Pii 1:17 2:5 2:5 1:9; Luk 6:20-21; 1Kor 1:26-28; Any 2:9 2:8 2:8 Mat 22:39; Rom 13:9 2:9 2:9 2:1

ke kihmo wa mar yaa toar loohnge. ¹⁰ Bang gihn keehd maa amagi loohnge cang unahge ke nye gihn me thiin mee e naa atoari yihdh gen, e beehd loohng nu cang ge naa atoari. ¹¹ Bang gihn ngaa anaa arob ngo kea, “Kea ngaa kaab dhaago,” anaa arubo thiow kea, “Kea ngaa nahg dhaano.” Nea yih kuu akahbo ke dhaago abea dhaano e naa anahg, e poohde loohng yea atoari.

¹² Nea yih urubo, kea rubi kedeaa tiihyi neehn nyoge me kedh ne kihmo ke loohng me cub laahw wihj. ¹³ Rubi kedeaa tiihy wa gihn nu bang gihn ukihm me cwihny be duu caahn yug Juoge yihr ngaan cwihnye be duu caahn rih dhaano. Duu cwihny caahn en ne wiihe ne maalo yihr ukihm.

Yiiho Caahdh Kaa Tiihj Me Beer

¹⁴ Jo'a gihn e ne konye nea dhaano ukoohbo kea yihre ne yiiho abea giijh me beeye me tiihye tooro? Wahye be rom kwaad yiiho me wa gihn nu ke boadho. ¹⁵ Koohbo kejea umiiho wale nyemiiho maa ngad yiiho yihre tooro waare kedeaa gihn me came. ¹⁶ Nea dhaano kiinu urubo yihre kea, “Yih ucaahdhi ke yoohm rihi. Yih uyihdi ke waaro me wumi rihi yi koohyo kedeaa cam uyoadi.” Nea giijh nu ge arob ngaan nu yihr umen wale nyemen maa ngad yiiho abea gihn me cube tooro ne kony ngo, e ngaan nu akony gihn? ¹⁷ Wa gihn nu thiow, yiiho e keede, nea be caahdh kaa tiihy giijh beeye e ngo beehda yiiho me koany gihre tooro.

¹⁸ Abea ngo ubeehr ngaa mooge kea, “Mari yihri ne yiiho abea mara yihra ne giijh me beeye maa atiihya.”

2:10 2:10 Mat 5:19; Gal 3:10; 5:3 2:12 2:12 1:25 2:13 2:13 Mat 5:7; 7:1; 18:32-35 2:14 2:14 Mat 7:21; 1Jon 3:17 2:15 2:15 Mat 25:35-36 2:17 2:17 Gal 5:6, 16, 22-24; 1Jon 3:18

Kea noono nyoadh yiiho gihri yihra ge yea tooro tiihy giih me beeye, e yiiho gihra ke dhe yoohn tiihy giih me beeye ngo nyoadha nyoadho yihri. ^{19*} Ngahdu kejea yiiho kejea Juog beehda acielo cog e ne boadh wun? Keehd atiihb ukeehg e ayiih gene kejea Juog beehda acielo cog kede a ge utudo yihre kwaade tooro.

²⁰ Yih ngaa maa gihn ge wihi atahg! Yih daahd gihn me nyoadh ngo yihri kejea yiiho me yea tooro tiihy giih me beeye, ngo yiiho me gihr nyinge tooro ne? ²¹ Ngahda kuowo Abraahm anaa anyoadh Juoge ne ngaa maa abiohgrwaal ke en ke nying gihn atiihye naa aceje waahde ke naah ne gihr kweehr yih Juog wihi kar lam ne? ²² Kuu aniidu kaa abeehn yiiho gihre kede a giih atiihye ucaahdh gene tiehd kede a e naa kaa abeehn gihn atiihye unienge ne cohg utoor gihn me daage ke nying gihn atiihye. ²³ E naa kaa abeehn gihn agweed yi kitaab Juog upahdhe kare. Agweed naa,

“Abraahm Juog ayiihe ke cwihnye acielo

e naa kaa anyoadh Juoge en ne ngaa maa abiohgrwaal ke Juog.”

Kede a maa acuohne ne gom Juog. ²⁴ Kuu aniidu kejea dhaano ngo nyoadh Juoge naa abiohgrwaal kaa nying tiihy giih me beeye abea padh ke nying yiiho e keede!

²⁵ Ke dhe yoohn ni, Raahb ge anahg ajaba, ngo anaa anyoadh Juoge naa abiohgrwaal ke nying gihn atiihye naa acube kar budo yih yaa Yijarael giih anaa aohr ne leng kede a unyoadhe ke dhe yooh moogo yih gen ne aay. ²⁶ Yiiho neehn kuohm. Nea wahy a'aay oogo rih kuohm e athow. Wa gihn nu yiiho me be tiihy giih me beeye ngo athow thiw.

* 2:19 2:19 Atiihb ukeehg; Mat 8:29; Mak 1:24 2:21 2:21 Rom 4:1-5, 13-16, 19-22; Judea 11:17 2:23 2:23 Rom 4:3 2:25 2:25 Mat 1:5; Judea 11:31 2:26 2:26 2:17, 20

3

Ngaa Keá Rub Oogo Ne Pahy

¹ Jo'a, nyoge me thoohdh kiin nu ge keá doohng ne yaa puohny bang gihn ngo ngahyu kejea wa yaa puohny wa ukihm ke dhe yooh maa angwaahn thiin yea. ² Wo cang awuohj beehde tiihyo tiihyo ke dhog yiehdhe me thoohdh. Dhaano me be waahj urobe gihn me raaj, e ngaan nu dhiil nahg ngaa me ne cohg, me ree cang ngahye kaa koaro.

³ Nea thool kaabo kaabo ukaare yi dhe cieny upaahro wiihe ne meeHg ngo yug gihn daahdo, e kare nud ulogo wiih cieny kun daahdo. ⁴ Wale baabuur thiow keehd maano nahge gihn me duohng me yamo me teeg e ne kool ngo, e ngo rom dhaane kaa kiiwo keehd coohd ge thiin ne ci ka daahd. ⁵ Wa gihn nu thiow, leeb beehda gihn me thiin mee yi kuohm dhaano abea thoohn giih nhyaam me doonge ge robe robo. Thiow maany piin maaj ge waang deeh dom cang. ⁶ Leeb thiow uroomo wa maaj, leeb en ne wiihe naa anyoohne giih nud wiih piny kiin giih rih dhaano utaahngo. Noono e gihn akob naa kuohm dhaano cang ngo raanye raanyo kedea uraanye dhe yoohn beehdo gihr dhaano. Batiene e leeb ke ngude gihn cub teeg raahnyo yihre, beehda gihn beehn ke yoohn paar maaj.

⁷ Kwaad giih me kuow cang, laahy, winy maa giih muun ke piny kedea giih beed yihdh piih ge rom dhaane kaa maango paajo wa mar diehg. Kedea ge giih maa anaa amaang paajo. ⁸ Abea leeb ngaa me rom ngo ke maango tooro udoge wiih ngo. Beehda ngad anyoohne me thare be piih piny. Leeb beehda cim me naah.

⁹ Leeb e ne poongo Ruohdho Juog Wuro keehde kedea e noono acielo e ne lam dhaano keehde beere yoad gihn me raaje yoado. Dhaano ge acag Juoge, wa cahd Juog, ngo lam leebe lamo. ¹⁰ Dhog gihn acielo e ne beehn puoje kedea lame oogo kii ngo. Jo'a gihn nu ngo awaahj. ¹¹ Kare nud ubeehn piih me yihdh gen tooro melo kedea piih melo utuom gen yi abuulo acielo? ¹² Jo'a kare nud ubeehn dhaane upone apuomo wiih gumelo? E naa ka bahnge piih me yihdh gen tooro melo ge be tuom yi abuulo me piihe beehda melo.

Dhog Yiehdh Ngahy Beehdo

¹³ Ngaa kiinu e ne ngahy dhe yoohn beehdo me beer kedea e ne ngahy dead yihdh nyepinye? Kwaad ngaa me wa gihn nu nyoadhe dhe yoohn ngahy luube kedea dead nyepinye kaa dhe yoohn tiihy gihn me beer me yea ne ngahy luube kedea beehdo ke bahdh yej. ¹⁴ Abea wu keá nhyaam kedea toohd keá robu ke nying giih tiel kedea lahj cwihny ge apahng yi yihdhu. ¹⁵ Kwaad giih nu ge tooro yi ngahy luube ge yoad ke dhe yoohn Paar Maalo. Giih nu ge yoad ke bang giih wiih piny kedea ke bang atiihb ukeehg. ¹⁶ Bang gihn kuohn ne giih tiele yihdh gen kedea giih lahj cwihny, beehda giih alyaahb kedea kwaad giih reje ge tiijj ge ne yoad yihdh gen.

¹⁷ Abea ngahy beehdo gihn yoad bang Juog ngo ne wag wag yea tooro gihn me raaj, batiene e ngo nhyaar beehdo ke doohr e liny tooro. Thiow yea yoohd kedea yea ne nhyaahro maa wiithe be teeg kedea tiihy giih me beeye kedea kiin nyoge be poje kedea lubo me kane tooro. ¹⁸ Yaa doohr nyoge me nyoadh dhe yoohn doohr ge neehn

3:12 3:12 Mat 7:16 3:13 3:13 Rom 12:16 3:14 3:14 1Kor 3:1-3; Gal 5:20-6:4 3:15 3:15 1:5, 17 3:17 3:17 Mat 5:48; 1Kor 13:4-7; Gal 5:22-23; Pihp 1:9-11 3:18 3:18 Mat 5:9

nyoge maa apiidh kohnho piny noono e gihn tuohl beehda nyoge maa abiohgrwaale.

4

Cubu Rogu Yihr Juog

¹ Gihn e ne kahl weehr kedea liny kiin nu? Beehda giih reje ge yuohd cwihnyu bang gen ge ne kahl weehr kedea liny kiinu. ² Cwihnyu yuohd rog giih nyepinye abea kar yoad gen wu goohge goohgo. Noono keehd dhaano utaahngo e ngo nahgu nahgo abea gihn daahdu poohd be yoadu. Noono e wu beehde e cwihnyu ne bang nyepiny keter abea ngo be yoadu e naa gihn weehru kedea ukagu kag. Gihn me yoadu tooro bang gihn wu be kwahyo bang Juog beere wu muoje muoje. ³ Abea keehd ge kwahyu e gihn ngo be yoadu, bang gihn giih daahdu ge be daahdu kaa nying gihn me beer, ge giih wiih piny ge nhyaar kooomu cog.

⁴ Wu yaa nhyaar giih wiih piny wu uroomo ke yaa nhyaar budo ke maahn nyoge abea yihr gen ne maahn, bang gihn nhyaar giih wiih piny beehda mahn ke Juog. ⁵ Wale nea maru e lum yea gihn agweed yi kitaab Juog kuu ayiihu, ge anaa agweede naa, “Wahy Juog ge acub Juoge ne beehd ke won piny be rome ke nywaago keehd giih ungoom ge yuohd cwihny rog gen?” ⁶ Abea keehd maano e Juog tee me duohng cube cubo yihro beere cwihnyo be yuohd rog giih reje. Wa kaa agweede yi kitaab Juog naa, “Juog tee cube cubo yihr yaa tooro nhyaame rog gen abea yaa nhyaam ge atiehnge ater.”

⁷ Nea maano e kea cubu rogu yihr Juog. Kweeru ke giih atiihb ukeehg beere ngo goohd oogo rogu. ⁸ Beehnu

4:1 4:1 Rom 7:5; 1Pii 2:11 4:2 4:2 1Jon 3:16 4:4 4:4 Mat 6:24; Jon 15:18-19; 1Jon 2:15 4:6 4:6 4:10; Mat 23:12; 1Pii 5:5 4:7 4:7 Epi 6:12; 1Pii 5:8-9

buud Juog beere ngo ubeehdo buudu. Wu yaa cwihnyu be piih yi nyepiny acielo cidhu bang Juog e adhemuohme giihu awiiu ngahdhu kedea e cwihnyu cang. ⁹ Cidhu e wu ukuumo wa nyoge me yuog thoo utoor ngaa me ngier woj piih nyingu ke nying giih anyoohne naa atiihyu. Yuog aduunu kedea rahny cwihnyu ke nying giih reje naa atiihyu. Ngaa keá ngiero kedea beehdu kaa kuumo utoor ngaa me cwihnye med. ¹⁰ Yugu rogu ne nyoge me ne bihdh nyum Juog kaano e Juog wudhu utihnge maalo.

¹¹ Jo'a rogu keá cayu kedea ngaa keá rob giih me reje rih wad gen. Nea giih nu tiihyu tiihyo e loohng Juog ge kooohbo kejea, “Nhyaaru rogu,” e naa ayugu ne gihn me raaj kobu ngo padh loohng me tiihy nyoge keehde. Abea ngo padh tiihyu ne rob ngo kejea loohng ngo beer wale ngo raaj. Gihn daahd Juoge yihru beehda tiih e ne tiihyu giih arob loohnge. ¹² Juog cog e naa ngaa cub loohng kedea e naa ngaa rom rob kejea loohng ngo beer wale raaj. Ngaan nu e ne yihre ne tee cub kuowo kedea thoo. Kare tooro unahge wun e ne piih ne kihm wadu maa ngad wong akeewo ke wun.

Nhyaam Ke Nying Giih Keroo

¹³ Lihngu gihn wu yaa kooohbo kejea, “Tihn noon ni wale keroo e wa caa geen anghino ne yug giih thaajir kedea wa ubeehdo kun nu ke kar wong acielo e wa yug giih thaajir beere wa uyihdo ke giih lonyo.” ¹⁴ Gihn utiihy ree keroo ngo ngahyu ne? Nihn ubeehdu wiih piny ge uroom wa mar ruohj. Ruohj nea ke nyango e ngo uneehno abea batien ka me thiin e ngo naa weehny utoore. ¹⁵ Ne beero nea wu ne kooohbo kejea, “Nea ngo gihn maa

4:9 4:9 Luk 6:25 4:10 4:10 4:6; 1Pii 5:6 4:11 4:11 1Pii 2:1 4:12 4:12
 Rom 14:4; 1Kor 4:5 4:13 4:13-14 Luk 12:18-20 4:15 4:15 Tiihy 18:21;
 Rom 1:10; 1Kor 4:19; 16:7

anhyaar Juoge e wa umeehg Juoge beehdo utiihy wane gihn kedea gihn.”¹⁶ Tooro, e gihru unahg nhyaam kedea maahg ke nying giihu ge gweehgu. Kwaad nhyaam me wa gihn nu, ngo raaj.¹⁷ Wudhu keá wul thiow. Ngaa ngahy gihn beer ge tiij, kedea ukweere ke tiijhy ngo e ngaan nu ayug adhemuohm.

5

Yaa Alony Ge atoohn

¹ Kea lihngu mara wu yaa alony. Awaahn ni, e naa cahng yuogu ke cwihnyu me keej ke nying giij me reje ge ubeehn ne pahdh wudhu. ² Keehd awaahn kan, e giij alonyu ke gen ge beehd e ge uroomo wa yaadh maa acam uthoadhe. Waare giihu ge beeye ge acam apuohj maahne. ³ Keehd dhaahb kedea demare giihu ge beehda giij maa akeadh. Keadh gen noono e nuu unyoadh ngo kejea dhe yoohn atiihyu giij lonyo giihu kii ngo padh dhe yooch me beer. Kaano e koohmu urahny cang neehn giij maa awaang maaj, bang gihn giij lonyo ge anaa acongu ne cohg kedea ukanu gen yihdh nihn ni adoohng ukihm Juoge cahng. ⁴ Abea noono lihngu gihn! Ngiihny yaa adooy puohdho ge kuu acubu yihr gen, noono e ge ayuog rih Juog ke nyingu, kedea lan yaa akaj giij puohdhu, ngo alihngo yihr Juog Aciehg. ⁵ Wu abeehdo wiijh piny e wu beed yi mow kedea unahge ke cam e naa acubu yi wudhu. Wu nhyaar cam ucwaadhu noono e wu unahg wa mar muor me nahg yi puohdho. ⁶ Anahg wu naa akihm nyoge me yihdh gen tar unahgu gen, nyoge me padh yaa mahn ke wun.

Guum Giij Raahyo Kedea Kwaj

⁷ Jo'a wu keá dhaahr abea kuru uwahdhe cahng ubeehn Ruohdhe. Maanyu ka na beehn ngaa me pure ucube cwihnye ne koar cahng ubeehn puohdhe uciege kedeá maanyu ka bahnge ngo be dhaahr ke koar puohj kodh uwahdhe gug kuunhe. ⁸ Wu thiow, wu keá dhaahr kedeá deedu cwihnyu teeg bang gihn beehn Ruohdh adoohng cahng. ⁹ Jo'a, rogu keá waayu. Nea maru kuu ngaa me kihm wun tooro ne? Ruohdh duohng ge kihmo, ngo ne dhe kala.

¹⁰ Jo'a romu rogu rogu yaa agamloohngjuog ge aguuum giih raahyo abea ge kuu adhaahr ge ne rub gene ke nying Ruohdh. ¹¹ Mihn cwihny gihn ayoad gene awaahn ni ngo ngahyo bang gihn ge aguuum. Romu rogu rih Job ge abar maalo ke gaahn Juog maano e deeh raahyo me duohng apahdh wiihe. Yihdh amahr giih me reje ge ayoade cang e gihn agweehg Juoge ke nying Job ge anaa abeehn oogo ne gihn me beer ngo ngahyu. Bang gihn Juog yihre ne nhyaahro kedeá cwihnye luue ke bang yaa ayoad raahyo.

¹² Jo'a, gihn wiihe ne maalo beehda ubahnge dhaano ree be kuohnge. Dhaano ree keá kuohnge ke maalo wale ke piny wale ke kwaad gihr nyepiny moogo. Nahge ke lubo acielo cog e ne robi kii 'Ayiihi' wale 'Gahng' nea gihn ngo beehda athiir wale gihn ngo padh athiir. Beere rogu be yoadu yi ukihm gihr Juog.

Kwaj Yihr Juog Ke Gaahno Yi Cwihny

¹³ Ngaa me gihn me raaj apahdh wiihe keewu kea dhiile Juog ke kwayo ke nying gihn nu. Yaa cwihny gen med ke nying gihn me beer maa ayoad gene, piih gene ne puoj Juog. ¹⁴ Ngaa me ree ledh cuohne yaa doonge giih akuud

5:7 5:7 2Pii 3:3 5:8 5:8 Rom 13:11-12; 1Th 5:5-8; Judea 10:25, 37 5:9
 5:9 Mat 7:1-2 5:10 5:10 Mat 5:12; Judea 11:32-38 5:11 5:11 1:12 5:12
 5:12 Mat 5:34-37 5:13 5:13 1:5-6; Tiiphy 16:25 5:14 5:14 Mak 6:13

yaa ayiiho ne beehn ne kway Juog wiihe. Kedeá beehn yaa doonge rey gene ngo ke mow e ge rob nying Juog beere ngo ke thiehdho. ¹⁵ Nea jo doonge ge akwahyo ke yiiho yi cwihny gen e ngo udoohng beer bang gihn ngo uthiehdh Juoge yihr gen. Nea atwaany gihre ayoade kaa nying adhemuohm maa atiihye, e adhemuohme uwii Juoge piny yihre. ¹⁶ Nea maano e adhemuohme maa atiihyu keá kanu yihr ngadu beere Juog kwaye kwayo ke nyingu uthiehdh Juoge wun bang gihn kway ngaa maa abiohgrwaal ke Juog giih me teeg ge tiihye tiihyo kedeá giih me beeye ge ke yoado ke nying kwaj gihre.

¹⁷ Eliija anahg dhaano utaahngo me neehn won. Abea naa akwahye, e ngo agaahne ke cwihnye acielo kejea kodh buu ucwii, e kodh kuu acwii ke kar run adahg ke nuuj.

¹⁸ Naa adoge kwaj beere kodh ucwii, e ngo acwii utuuy nyepinye ucieg gene.

¹⁹ Jo'a, nea ngaa maa a'aay oogo yi lum Juog kiinu udog ngaa mooge ngo ke duuo yi lum Juog, ²⁰ e kea paru gihn: Kwaad ngaa kony ngad adhemuohm uduue yi lum Juog, e ngaan nu aboadh wahy ngo yi thoo kedeá umeehge Juog wii amahr adhemuohme piny.

Anwehd Me Nyaahn

Luwo: Anwehd Me Nyaahn New Testament

copyright © 2003 Wycliffe Bible Translators, Inc.

Language: (Luwo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 13 Jun 2022

ba8353b1-57d5-55f2-870a-7ae8e7acbe62